



REPUBLIKA E SHQIPËRISË

KËSHILLI I EMËRIMEVE NË DREJTËSI

VENDIM

Nr. 32, datë 17.09.2025

PËR VLERËSIMIN DHE PIKËZIMIN E KANDIDATURËS SË ZOTIT ALBAN TORO NË VENDIN VAKANT, PËR GJYQTAR NË GJYKATËN KUSHTETUESE, SHPALLUR NGA GJYKATA E LARTË MË DATË 11.12.2024

Këshilli i Emërimeve në Drejtësi, i përbërë nga :

Sokol Sadushi	Kryetar
Marjana Semini	Zëvendëskryetare
Ilir Toska	Anëtar
Alma Muça	Anëtare
Fuat Vjerdha	Anëtar
Enkela Vlora	Anëtare relatore
Irma Balli	Anëtare
Etien Kapo	Anëtar
Nafije Hasko	Anëtar

Asistuar nga sekretare Katerina Bilo me praninë e Avokates së Popullit, znj. Erinda Ballanca, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi (KED), në mungesë të përfaqësuesve të autorizuar të subjekteve të ftuara sipas ligjit për pjesëmarrje, në mbledhjen e datës 17.09.2025, mori në shqyrtim çështjen që i përket:

KANDIDATIT: Alban Toro

OBJEKTI: Kandidim për gjyqtar në Gjykatën Kushtetuese në vendin vakant të shpallur nga Gjykata e Lartë më datë 11.12.2024.

KËSHILLI I EMËRIMEVE NË DREJTËSI

Pasi dëgjoi relatimin e anëtares së KED-it, zonjës Enkela Vlora, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Rrethanat e çështjes

1. Në përfundim të procedurës së verifikimit për këtë kandidat, Këshilli i Emërimeve në Drejtësi (në vijim referuar edhe si KED) me vendimin nr. 16, datë 17.06.2025 ka vendosur “Lejimin e kandidimit të kandidatit Alban Toro, në vendin vakant për gjyqtar në Gjykatën

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Kushtetuese, shpallur nga Gjykata e Lartë në datën 11.12.2024”, vakancë e krijuar në Gjykatën Kushtetuese pas deklarimit të mbarimit të mandatit të gjyqtarës Holta Zaçaj.

2. Në zbatim të dispozitave të ligjit nr. 8577/2000 dhe të ligjit nr. 115/2016, si edhe atyre të Kreut IV (pikat 27-38) të vendimit nr. 5 datë 02.04.2019 “*Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, anëtarja e Këshillit, znj. Enkela Vlora, në cilësinë e relatores të vendit vakant të cituar më lart, ka realizuar veprimet përgatitore të procedurës së vlerësimit dhe pikëzimit të kandidatëve, njëkohësisht me procedurat e verifikimit të tyre.

3. Këshilli i Emërimeve në Drejtësi, pasi shqyrtoi procedurat e ndjekura gjatë veprimeve përgatitore nga secili relator dhe plotësinë e dokumentacionin të paraqitur për vlerësim nga secili kandidat, dëgjoi mendimin e Avokatit të Popullit lidhur me mënyrën e procedimit të ndjekur për përgatitjen e dokumentacionit të kandidatëve, me vendimin e datës 09.09.2025 ka vendosur fillimin e procedurave të vlerësimit, pikëzimit dhe renditjes së kandidatëve të lejuar për vendin vakant për gjyqtar në Gjykatën Kushtetuese, vakancë e krijuar në Gjykatën Kushtetuese pas deklarimit të mbarimit të mandatit të gjyqtarës Holta Zaçaj.

4. Bazuar në aktet që janë dorëzuar nga kandidati Alban Toro në momentin e kandidimit dhe gjatë fazës përgatitore të procedurës së vlerësimit, anëtarja e Këshillit, relatore e vendit vakant në të cilën ky kandidat ka paraqitur kandidaturën e tij, hartoi relacionin përkatës për gjetjet në procedurën e përzgjedhjes dhe të vlerësimit të këtij kandidati për gjyqtar në Gjykatën Kushtetuese, i cili i është njoftuar kandidatit.

5. Kryetari i Këshillit ka thirrur mbledhjen e Këshillit në datën 16.09.2025, ora 13:00, për zhvillimin e intervistës dhe testimin e njohurive të gjuhës së huaj me kandidatët e lejuar. Kandidati Alban Toro përzgjodhi të intervistohet në gjuhë të huaj (italisht), për pasojë me vendimin nr. 26, datë 11.09.2025 të KED, u vendos marrja e ekspertit të gjuhës së huaj. Në datë 12.09.2025, kandidati u njoftua për vendimin për caktimin e datës së intervistës dhe testimin të gjuhës së huaj, si dhe caktimin e ekspertit. Kandidati mori dijeni, duke deklaruar se nuk ka shkaqe papajtueshmërie me ekspertin.

6. Intervista mbi motivimin e kandidimit me kandidatin Alban Toro u zhvillua në mbledhjen e Këshillit të datës 16.09.2025.

II. Parimet dhe burimet ligjore që udhëheqin vlerësimin

7. Këshilli i Emërimeve në Drejtësi (KED) vepron mbi bazën e Kushtetutës dhe Ligjit nr. 115/2016, duke zbatuar rregullat procedurale të Vendimit nr. 4, datë 11.03.2019 (procedura e verifikimit) dhe metodologjinë e Vendimit nr. 5, datë 02.04.2019 (kriteret/peshët e pikëzimit). Këto akte garantojnë kompetencën e organit, rregullshmërinë formale dhe mjetet e transparencës për një vendimmarrje të arsyetuar, të verifikueshme dhe të drejtë. Parimet mbizotëruese: (i) *ligjshmëria*, (ii) *barazia dhe mosdiskriminimi*, (iii) *paanësia dhe shmangia e konfliktit të interesit*, (iv) *e drejta e dëgjimit dhe transparenca*, (v) *proporcionaliteti dhe arsyetimi*, (vi) *parashikueshmëria dhe konsistenca në zbatimin e kriterëve*.

8. *Rregullshmëria procedurale (shorti, njoftimet, verifikimi, votimi)*. Procesi i vlerësimit nisi me caktimin me short të relatorit dhe përcaktimin e këshilltarëve ligjorë; vijoi me njoftimet

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

ndaj institucioneve dhe kandidatëve, administrimin e materialeve, verifikimet sipas Vendimit nr. 4 (përfshirë kontrollin e integritetit, pasurisë dhe papajtueshmërisë) dhe me mbledhjen ku bëhet diskutimi i raporteve dhe votimi i hapur. Publikimi i rezultatit dhe përgatitja e “raportit të arsyetuar” siguron transparencën e aktit përfundimtar.

9. Respektimi i këtyre hapave është kusht i domosdoshëm për ligjshmërinë e pikëzimit: dështimi në cilindo hap do të çenonte aktin. Në rastin konkret, dokumentet e administruara dhe tabelat përfundimtare pasqyrojnë ecuri të përputhur me skemën ligjore.

10. *Metodologjia: kriteret, pesha dhe “mesatarja kolegjiale”*. Metodologjia e KED strukturohet në tri blloqe: (1) Meritat Profesionale (deri 60 pikë), (2) Meritat Morale (deri 30 pikë), (3) Meritat Organizative/Drejtues-Menaxheriale (deri 10 pikë). Brenda secilit bllok, nën-kriteret dhe indikatorët janë të paracaktuar (p.sh., vjetërsi/arsim/“pesë dokumente”/gjuhë për bllokun profesional; integritet/reputacion për bllokun moral; platforma/vizioni për bllokun organizativ). Çdo anëtar i KED vlerëson individualisht; rezultati përfundimtar është mesatarja e pikëve të 9 anëtarëve (“mesatarja kolegjiale”). Kjo teknikë zvogëlon ndikimin e çdo skaji individual (shumë i lartë ose shumë i ulët) dhe e bën totalin produkt të një vlerësimi kolegjial, jo të një individi. Për rrjedhojë, edhe kur anëtarët ndryshojnë në nuanca, ligjshmëria e vendimit ruhet nëse kriteret zbatohen njësoj dhe arsyetimi është i pranishëm.

11. *Testet e ligjshmërisë së vlerësimit (kontrolli i brendshëm i KED)*. Për të qenë i qëndrueshëm juridikisht, pikëzimi kalon disa “teste” të brendshme kontrolli:

- Testi i kompetencës dhe formës: organi i duhur, akti në formën e ligjit dhe rregullit të brendshëm; procesverbalet dhe tabelat ekzistuese;

- Testi i procedurës: shorti, njoftimet, verifikimi, e drejta e dëgjimit, mbledhja, votimi i hapur, raportimi i arsyetuar.

- Testi i kriterit: zbatimi i njëjtë i metodologjisë (60/30/10) për të gjithë kandidatët, pa shmangie nga treguesit e paracaktuar.

- Testi i barazisë: trajtim i njëjtë i situatave të njëjta dhe arsyetim i diferencave kur ekzistojnë.

- Testi i proporcionalitetit: pikët në raport të drejtë me provat (as nën- e as mbi-vlerësim i pajustificuar).

- Testi i arsyetimit: lidhje e qartë “provë → nën-kriter → pikë → total”.

- Testi i transparencës: publikim i renditjes dhe tabelave, mundësia e verifikimit publik.

III. Vlerësimi i Këshillit të Emërimeve në Drejtësi

12. Në përfundim të intervistës, bazuar në të dhënat e nxjerra nga biseda mbi motivimin e kandidimit, si edhe bazuar në aktet dhe dokumentet që janë dorëzuar nga kandidati Alban Toro në momentin e paraqitjes së kërkesës për kandidim, dokumente të paraqitura prej tij sipas kërkesave të Këshillit, si edhe shkresa dhe të dhëna të tjera të kërkuara apo të ardhura zyrtarisht nga institucione të ndryshme, Këshilli ka vënë në bisedim vlerësimin dhe pikëzimin e kandidatit Alban Toro për secilin nga kriteret e vlerësimit të përcaktuara:

“a) në pikën 4 dhe 5 të nenit 125 të Kushtetutës;

b) në nenin 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuar, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit nr. 115/2016;

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

c) në detajimin e mëtejshëm të kriterëve ligjore të posaçme dhe të përgjithshme të vlerësimit dhe përcaktimit më të hollësishëm të peshës specifike të tyre në pikëzimin dhe renditjen e kandidatëve të treguar në Kreun II, në Kreun V dhe në Shtojcën 1 të Vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”;

ç) në shpjegimet e hollësishme lidhur me metodologjinë mbi të cilin bazohet në vlerësimi dhe caktimi i pikëve të miratuar nga Këshilli i Emërimeve në Drejtësi me vendimin nr. 51 datë 21.06.2019 “Për miratimin e metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese”.

A. Meritat profesionale – Historiku Arsimor dhe Profesional

Vjetërsia në profesion

13. Në shkronjën “a” të pikës 3 të nenit 7/a të ligjit nr. 8577/2000, përcaktohet si kriter vlerësimi “Vjetërsia në profesion”. Ndërkohë që, sipas nenit 125 të Kushtetutës dhe nenit 7/a pika 2 shkronja “a” të ligjit nr. 8577/2000, përbën kusht lejimi kandidimi që kandidati të ketë së paku 15 vjet përvojë profesionale si gjyqtar, prokuror, avokat, profesor ose lektor të së drejtës, nëpunës (jurist) të nivelit të lartë në administratën publike.

14. Prandaj, Këshilli vlerëson me pikë kohëzgjatjen e të gjithë përvojës profesionale të secilit kandidat, në maksimum deri në 4 pikë, sikurse orientohet në tabelën e përshkallëzuar të pikëzimit të vjetërsisë në profesion të treguar në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

15. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Alban Toro, ka ushtruar veprimtaritë profesionale si më poshtë:

- a) Për periudhën 10.08.1995 - 08.01.2003, Jurist në Byronë Juridike të Bankës Kombëtare Tregtare sha, për 7 vite, 4 muaj e 29 ditë;
- b) Për periudhën 30.12.2002 - 09.01.2006, Përgjegjës i Sektorit Juridik dhe Burimeve Njerëzore, Agjencia e Sigurimit të Depozitave, për 3 vite e 10 ditë;
- c) Për periudhën për 01.03.2007 - 12.11.2010, Drejtor Departamenti Juridik, shoqëria e sigurimeve “Atlantik” sha, 3 vite, 8 muaj, 11 ditë;
- ç) Për periudhën 09.01.2006 – 02.03.2010¹, Avokat, për 4 vjet, 1 muaj e 21 ditë;
- d) Për periudhën 20.09.2011² – 27.02.2018, Avokat, për 6 vjet, 5 muaj, 7 ditë;
- dh) Për periudhën 24.04.2018³ – 12.12.2018, Avokat, për 7 muaj, 18 ditë.
- e) Për periudhën 12.12.2018 - 25.07.2024, Anëtar i Këshillit të Lartë Gjyqësor, për 5 vite, 7 muaj, 13 ditë.

16. Mbështetur në të dhënat e sipërcituara, rezulton se në rastet e veprimtarive sipas shkronjave “ç”, “d”, “dh” dhe “e” kandidati Alban Toro ka ushtruar veprimtari profesionale në fushat e përcaktuara sipas nenit 125 të Kushtetutës dhe nenit 7/a të ligjit nr. 8577/2000. Mbështetur në të dhënat e sipërcituara, rezulton se kandidati Alban Toro ka vjetërsi në profesion si jurist i

¹ Në datë 02.03.2010 pezulluar statusi në QKB.

² Në datë 20.09.2011 aktivizuar statusi në QKB, pezulluar në datë 27.02.2018.

³ Në datë 24.04.2018 aktivizuar statusi në QKB, pezulluar në datë 21.12.2018.

nivelit të lartë dhe në fushën e veprimtarive të tjera profesionale sipas përcaktimeve të nenit 125 të Kushtetutës dhe nenit 7/a të ligjit nr. 8577/2000, 16 vite e 9 muaj e 29 ditë, duke përllogaritur funksionin e ushtruar nga kandidati pranë Këshillit të Lartë Gjyqësor dhe përvojën profesionale si avokat. Ndërsa vjetërsi në profesion si jurist kandidati ka gjithsej mbi 27 vite e 3 muaj.

17. Për këto arsye, për kriterin e vlerësimit “vjetërsia në profesion”, nisur nga ushtrimi i veprimtarive profesionale të sipërcituara (27 vite e 3 muaj vjetërsi në profesion si jurist), Këshilli çmoi ta vlerësojë kandidatin Alban Toro gjithsej me **36 Pikë**.

Historiku Arsimit

18. Në shkronjën “d” të pikës 3 të nenit 7/a të ligjit nr. 8577/2000, përcaktohet si kriter vlerësimi edhe ecuria gjatë kryerjes së arsimit të lartë me një notë mesatare jo më pak se 8 ose të barasvlefshme me të, ndërkohë që edhe shkronja “c” e pikës 1 të nenit 240 të ligjit nr. 115/2016 kërkon të vlerësohen rezultatet gjatë studimeve në ciklet e arsimit të lartë.

19. Prandaj, Këshilli vlerëson me pikë ecurinë gjatë kryerjes së arsimit të lartë me një notë mesatare jo më pak se 8 ose të barasvlefshme me të, të secilit kandidat, sipas përshkallëzimit me 1 pikë të notës mesatare mbi 8 dhe me 2 pikë të notës mesatare mbi 9, sikurse orientohet në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

20. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Alban Toro ka përfunduar studimet universitare pranë Fakultetit të Drejtësisë, Universiteti i Tiranës, gjatë viteve 1991-1995, me notë mesatare 9.18.

21. Për sa më lart, nisur nga përllogaritja e kryer nga Këshilli sipas të cilës nota mesatare e arritur nga kandidati Alban Toro gjatë studimeve dhe diplomimit në Fakultetin e Drejtësisë në Universitetin e Tiranës është 9.18, për kriterin e vlerësimit “*historiku arsimit*”, Këshilli çmoi ta vlerësojë kandidatin gjithsej me **18 Pikë**.

Kualifikime Pasuniversitare

22. Në pikën 3 të nenit 7/a të ligjit nr. 8577/2000 dhe pikat 1 e 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi kualifikimet pasuniversitare. Ky kriter vlerëson llojin dhe nivelin e angazhimit të kandidatit në ndjekjen e veprimtarive të kualifikimit profesional që mundësojnë arritjen e një profesionalizmi më të madh në shërbim të ushtrimit të funksioneve dhe detyrimeve profesionale të tilla si, pasja e titujve akademikë, gradave shkencore, ecuria dhe kryerja e kualifikimeve pasuniversitare, studimeve dhe specializimeve afatgjata (përfshirë Shkollën e Magjistraturës), si edhe kryerja e trajnimeve afatgjata dhe afatshkurtra në fushën e të drejtave kushtetuese, të drejtave të njeriut, si edhe në fusha të tjera të së drejtës.

23. Referuar kriterëve ligjore të vlerësimit dhe metodologjisë së pikëzimit, që gjejnë pasqyrim në mënyrë të detajuar në Shtojcën nr. 1 të vendimit nr. 5 datë 02.04.2019 të Këshillit të Emërimeve në Drejtësi kualifikimeve pasuniversitare, si një nga indikatorët me të cilët vlerësohet niveli profesional i kandidatëve, u janë caktuar në total 8 pikë.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

24. Prandaj, në zbatim të ligjit, Këshilli i Emërimeve në Drejtësi vlerëson me pikë llojin e titujve akademikë dhe gradave shkencore, llojin, kohëzgjatjen, fushën dhe vendin e kryerjes së kualifikimeve pasuniversitare, studimeve, specializimeve dhe trajnimeve të kandidatëve, duke pasur parasysh shpërndarjen e pikëve sipas vendimit nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

25. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton se kandidati Alban Toro ka tituj akademik/profesional dhe grada shkencore, në rend kronologjik si vijon:

- Kandidati ka përfunduar studimet dhe është diplomuar si “Jurist” në vitin 1991-1995, në Universitetin e Tiranës, Fakulteti i Drejtësisë, me notë mesatare 9.18.
- Gjatë periudhës 1993-1994 është regjistruar në Universitetin e Trentos, Itali, në kursin e diplomës si student “Tempus”.
- Kandidati ka fituar titullin profesional “Avokat” dhe është pajisur me licencën e avokatit nr. 716, që në vitin 1999.

26. Sipas Metodologjisë së Vlerësimit dhe Caktimin e Pikëve, kandidati nuk rezulton të ketë tituj akademik dhe/ose grada shkencore apo kualifikime/studime/specializime pasuniversitare. Për këto arsye, për këtë kriter vlerësimi, Këshilli çmoi ta vlerësojë kandidatin Alban Toro gjithsej me **0 Pikë**.

27. Për treguesin e vlerësimit “*Trajnimet e tjera*”, vlerësohen veçanërisht trajnime me një kohëzgjatje minimale 2 javore, duke mbajtur parasysh edhe numrin, llojet, tematikat dhe kohëzgjatjet e përgjithshme të trajnimeve në fusha të caktuara, institucionet trajnuese, si dhe nëse trajnimet janë shoqëruar me një certifikatë vlerësimi. Lidhur me këtë kriter vlerësimi, Këshilli mund të caktojë deri në 2 pikë.

28. Nga akti dokument i jetëshkrimit të kandidatit që ndodhet në dosjen e kandidimit rezulton se kandidati Alban Toro, deklaroi se ka kryer këto trajnime:

Periudha: 13 – 17 Dhjetor 1995

Tematika: “Collateral Law” (“Ligji për garancitë”)

Institucioni trajnues: International Development Law Institute (Instituti Ndërkombëtar i të Drejtës për Zhvillim)

Vendi: Tiranë, Shqipëri

Periudha: 6 – 10 Maj 1996

Tematika: “Legal Aspects of Bank Privatization” (Aspektet ligjore të privatizimit të bankave”)

Institucioni trajnues: International Development Law Institute (Instituti Ndërkombëtar i të Drejtës për Zhvillim)

Vendi: Tiranë, Shqipëri

Periudha: 1 – 5 Korrik 1996

Tematika: “Capital and Securities Market Investment” (Investimi në tregun e kapitalit dhe të letrave me vlerë)

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Institucioni trajnues: International Development Law Institute (Instituti Ndërkombëtar i të Drejtës për Zhvillim)
Vendi: Tiranë, Shqipëri

Periudha: 23 – 27 Shtator 1996

Tematika: “Commercial Loan Documentation and Non-Performing Loans” (Dokumentacioni i Kredisë Tregtare dhe Kreditë me probleme)

Institucioni trajnues: International Development Law Institute (Instituti Ndërkombëtar i të Drejtës për Zhvillim)

Vendi: Tiranë, Shqipëri

Periudha: 24 – 28 Nëntor 1998

Tematika: “Concessions and Project Finance for Infrastructure Development” (Koncensionet dhe financimi i projekteve për zhvillimin e infrastrukturës)

Institucioni trajnues: International Development Law Institute (Instituti Ndërkombëtar i të Drejtës për Zhvillim)

Vendi: Tiranë, Shqipëri

Periudha: 5 – 16 Qershor 2000

Tematika: “Financial Transaction for Lawyer – An Introduction organized by the International Monetary Fund” (Transaksionet Financiare për Avokatët – Hyrje)

Institucioni trajnues: International Monetary Fund (Fondi Monetar Ndërkombëtar)

Vendi: Tiranë, Shqipëri

Po ashtu nga jetëshkrimi i kandidatit, tej atyre të sipërcituara (për të cilat ka paraqitur dokumentacion mbështetës), rezulton se kandidati ka deklaruar takime me natyrë shkëmbim eksperience dhe bashkëpunimi me disa Këshilla të Lartë Gjyqësor Ndërkombëtar (Portugali-Kroaci). Lidhur me këtë eksperiencë, kandidati Alban Toro elektronikisht, ndër të tjera, ka deklaruar se, këto nuk kanë qenë trajnime klasike me program të miratuar dhe certifikatë përkatëse, por më shumë shkëmbime praktike ndërinstitucionale, formale me karakter njohës, krahasues e shkëmbyes përvojash ndërmjet institucioneve. Gjithashtu kandidati pasi sqaron faktin se, nuk ka dokumentacion të formalizuar që t'i shoqërojë, sjell në vëmendje vlerën profesionale që shkëmbimi i përvojës ka sjellë në praktikën e tij të përditshme. Lidhur me aktivitete të kësaj natyre, kandidati Alban Toro ka paraqitur programin lidhur me vizitën studimore të Këshillit të Lartë Gjyqësor të Shqipërisë në Këshillin e Lartë të Gjyqësorit në Portugali, në datat 23, 24 dhe 25 Maj, vizitë në kuadër të: *Forcimit të efikasitetit dhe cilësisë së sistemit të drejtësisë në Shqipëri (SEJ III)*.

29. Sa më sipër, mbështetur në të dhënat e jetëshkrimit të kandidatit dhe dokumentacionit të administruar në procedurën e verifikimit të kandidaturës, si dhe duke pasur parasysh se kandidati ka trajnime cilësore në përmbajtje të tematikës, ndonëse jo të shumta në numër, me kohëzgjatje të shkurtër dhe të hershme në kohë, për këtë kriter ligjor vlerësimi Këshilli çmoi ta vlerësojë gjithsej me **10.5 Pikë**.

Njohja e gjuhëve të huaja

30. Në shkronjën “c” të pikës 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi niveli i zotërimit të gjuhëve të huaja.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

31. Prandaj, në zbatim të ligjit, Këshilli i Emërimeve në Drejtësi vlerëson me pikë llojin dhe numrin e gjuhëve të huaja, si edhe nivelin e zotërimit të tyre nga ana e kandidatëve, duke pasur parasysh sasinë e pikëve maksimale përkatëse sipas vendimit nr. 5, datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

32. Nga aktet që ndodhen në dosjen e kandidimit rezulton se, kandidati ka depozituar dëshmi për dhënie e provimit në gjuhën italiane ku është vlerësuar me notën 9 (nëntë), nga Fakulteti i Gjuhëve të Huaja, Universiteti i Tiranës, si dhe dëshmi për dhënie e provimit në gjuhën angleze ku është vlerësuar me notën 8 (tetë), nga Fakulteti i Gjuhëve të Huaja, Universiteti i Tiranës.

33. Në Metodologjinë e Vlerësimit dhe Caktimit të Pikëve lidhur me këtë kriter vlerësimi citohet ndër të tjera se, për vlerësimin e njohurive për gjuhët e huaja, në rastet kur Këshilli e vlerëson të nevojshme, do të caktojë ekspertë të gjuhës së huaj, të cilët japin mendim për shkallën e zotërimit të aftësive gjuhësore të kandidatit/es. Shkalla e zotërimit të aftësive gjuhësore të kandidatit/es mund të vlerësohet deri në 3 Pikë. Gjithashtu, Këshilli mban parasysh edhe zotërimin e gjuhëve të tjera të deklaruara për të cilat kandidati/ja nuk testohet gjatë intervistës, me kushtin që të jenë të shoqëruara me dokumente vlerësuese të vlefshme për nivelin e njohurive të tyre. Në këtë rast, krahas vlerësimit konkret me pikë për gjuhën e huaj të zgjedhur prej tij/saj për pikëzim, kandidatit/es mund t'i shtohet 1 Pikë.

34. Kandidati Alban Toro u testua për nivelin e njohurive të gjuhës së huaj (*italisht*) dhe sipas ekspertës së caktuar nga Këshilli, shkalla e zotërimit të gjuhës së huaj italiane nga kandidati Alban Toro është vlerësuar me 3 (*tre*) pikë.

35. Këshilli, vlerësoi të dhënat që përmban dosja e kandidimit nga ku rezulton se kandidati ka paraqitur dokument vlerësues të vlefshëm për aftësitë e tij gjuhësore në gjuhën e huaj (*italisht dhe anglisht*) si dhe është testuar nga ekspertja e caktuar nga Këshilli për nivelin e njohurive të gjuhës (*italisht*), për rrjedhojë çmoi ta vlerësojë kandidatin Alban Toro për këtë kriter ligjor vlerësimi, gjithsej me **36 Pikë**.

B. Meritat profesionale – Kualifikimi i Përgjithshëm Profesional

36. Në shkronjën “ç” të pikës 3 të nenit 7/a të ligjit nr. 8577/2000 dhe në shkronjën “a” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e përgjithshëm profesional, përcaktohen si kritere vlerësimi, në bazë të treguesve shkencorë, performanca e dalluar dhe rezultatet e larta në ushtrimin e profesionit, që mbështetet ndërmjet të tjerave në botimet dhe artikujt shkencorë në fushën juridike, në produktet profesionale sipas profileve të ushtrimit të profesionit, rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e dallueshme të arritura gjatë përvojave të tyre të punës e që lidhen me ushtrimin e funksioneve në fushën përkatëse.

37. Prandaj, në zbatim të ligjit, Këshilli i Emërimeve në Drejtësi vlerëson me pikë si sasinë ashtu edhe cilësinë e rezultateve profesionale, me një fokus të veçantë tek cilësia. Në këtë mënyrë, bazuar në të dhënat e mundshme të disponueshme për vlerësim, mbahen parasysh sasia e pikëve maksimale prej 30 pikësh, sipas vendimit nr. 5, datë 02.04.2019 të KED, si edhe orientimet për caktimin e mundshëm të një maksimumi prej 25 pikësh për sa i përket vlerësimit

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

cilësor dhe të një maksimum prej 5 pikësh për vlerësimin e sasisë së rezultateve profesionale sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

38. Në rastin e kandidatit Alban Toro, Këshilli shqyrtoi dokumente profesionale dhe të dhënat që mund të disponoheshin nga veprimtaria e tij profesionale, si edhe nga kontributet e tjera profesionale të këtij kandidati në veprimtari të ndryshme, përfshirë publikime apo punime e artikuj shkencorë.

39. Nga aktet që ndodhen në dosjen e kandidimit rezulton se kandidati Alban Toro ka dorëzuar punimet profesionale si më poshtë vijon:

Punime profesionale

- Relacion nr. 197 prot., datë 18.01.2023 "Mbi gjendjen e faktit dhe zbatimin e mekanizmave ligjorë për plotësimin e pozicioneve të lira të përhershme e atyre të përkohshme në Gjykatën e Rrethit Gjyqësor Tiranë dhe Gjykatën e Rrethit Gjyqësor Durrës" – Relator Alban Toro;
- Projektvendim "Për hapjen e procedurës së lëvizjes paralele në Gjykatën e Rrethit Gjyqësor Tiranë, për një pozicion të lirë në fushën e të drejtës civile" – Komisioni i Zhvillimit të Karrierës pranë Këshillit të Lartë Gjyqësor;
- Projektvendim "Për hapjen e procedurës së lëvizjes paralele në Gjykatën e Rrethit Gjyqësor Durrës, për një pozicion të lirë në fushën e të drejtës civile"; – Komisioni i Zhvillimit të Karrierës pranë Këshillit të Lartë Gjyqësor;
- Vendim i Këshillit të Lartë Gjyqësor nr. 11, datë 18.01.2023 "Për hapjen e procedurës së lëvizjes paralele në Gjykatën e Rrethit Gjyqësor Tiranë, për një pozicion të lirë në fushën e të drejtës civile";
- Vendim i Këshillit të Lartë Gjyqësor nr. 24, datë 18.01.2023 "Për hapjen e procedurës së lëvizjes paralele në Gjykatën e Rrethit Gjyqësor Durrës, për një pozicion të lirë në fushën e të drejtës civile".
- *‘Pretendime përfundimtare’* në lidhje me çështjen gjyqësore me paditëse R.B, kundër shoqërisë Tirana Bank sha, me objekt *“Detyrimi i palës së paditur për të fshirë nga Rregjistri i kredisë mbajtur pranë autoritetit përgjegjës Banka e Shqipërisë të Historikut tim si Debitore dhe si Klient me Status Negativ për të gjithë periudhën që kjo kontratë bankare më ka penalizuar pa të drejtë. Detyrimi i palës së paditur të paguajë dëmin pasurorë në vlerën 1.800.000 lekë të shkaktuar nga rregjistrimi i padrejtë me status "debitore" në rregjistrin e kredisë të mbajtur nga autoriteti përgjegjës si edhe shpenzimet e tjera; Detyrimi i palës së paditur të paguajë dëmin jo pasurorë në vlerën 1.000.000 lekë.”*, drejtuar Gjykatës së Rrethit Gjyqësor Tiranë, Av. Alban Toro.
- Fotokopje e dosjes me nr. 5660 vendimi, datë 22.06.2017 e Gjykatës së Rrethit Gjyqësor Tiranë për çështjen e mësipërme me paditëse R.B, kundër shoqërisë Tirana Bank sha, me përmbajtje: Kërkesëpadi nënshkruar nga paditësja R.B, prokurë e posaçme, pretendimet përfundimtare të të paditurit; vendimi nr. 5660, datë 22.06.2017 i Gjykatës së Rrethit Gjyqësor Tiranë (paditësja përfaqësuar në gjykim me prokurë nga Av. Alban Toro); ankim në Gjykatën e Apelit Tiranë nënshkruar nga paditësja R.B; vendimi nr. 1165, datë 11.07.2018 i Gjykatës së Apelit Tiranë (paditësja përfaqësuar në gjykim me deklaram nga Av. A. P).
- Fotokopje e dosjes me nr. 5660 vendimi, datë 22.06.2017 e Gjykatës së Rrethit Gjyqësor Tiranë për çështjen e mësipërme me paditëse R.B, kundër shoqërisë Tirana

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Bank sha, me përmbajtje: Kërkesëpadi nënshkruar nga paditësja R.B; pretendimet përfundimtare të palës paditëse nënshkruar nga paditësja R.B; parashtime të paditëses R. B në Gjykatën e Apelit Tiranë nënshkruar nga paditësja.

- Vërtetim datë 20.06.2025 i TONUÇI & PARTNERS sipas të cilës vërtetohet se Alban Toro ka përfaqësuar shoqërinë Gen-I Tirana shpk filial i shoqërisë Gen-I Slloveni, në të gjitha shkallët gjyqësore dhe ka bashkëpunuar apo përgatitur të gjitha aktet për të gjitha gjykatat së bashku me avokatët e TONUÇI & PARTNERS për çështjen *"Gen-I Tirana" shpk kundër "Banka Intesasanpaolo Albania" ShA, përfunduar me Vendimin e Gjykatës së Lartë, Kolegji Civil nr. 00-2015 (520), datë 23.12.2015 lidhur me instrumentin e garancisë bankare*. Bashkëlidhur: Kërkesëpadi me paditës Gen-I Tirana shpk, kundër Banka Intesa Sanpaolo Albania sha, me objekt *"Detyrimin e te Paditurit te paguaje kryegjënë prej 858,996.40 Euro si detyrim monetar i krijuar nga lëshimi i garancisë bankare me numër 000GTNS113360002, date 02.12.2011 ("Garancia Bankare") si dhe çdo shume tjetër monetare si kamate vonese dhe/ose interes ligjor mbi kryegjënë."*, nënshkruar nga N. K.; pretendimet e paditësit Gen-I Tirana shpk nënshkruar nga Av. Alban Toro; pretendimet përfundimtare të paditësit Gen-I Tirana shpk nënshkruar nga Av. Alban Toro dhe N. K.; ankimi i paditësit Gen-I Tirana shpk nënshkruar nga N. K., autorizim për avokatët N. K., dhe Alban Toro; plotësim rekursi të paditësit Gen-I Tirana shpk nënshkruar nga Av. Alban Toro, nënshkruar nga avokatët N. K., dhe Alban Toro, pretendime përfundimtare.
- Kthim përgjigje nr. 209/1 prot., datë 20.01.2025 i Këshillit të Lartë Gjyqësor bashkëlidhur:
 - Relacion me nr. 4419 prot., datë 10.09.2019 dhe Projektvendim "Për skualifikimin dhe përjashtimin e kandidatit z. Altin Binaj nga procedura e emërimit në Gjykatën e Lartë", miratuar me vendimin Nr. 171, datë 11.09.2019 të KLGJ-së – Relator Alban Toro.
 - Projektvendim "Për skualifikimin dhe përjashtimin e kandidatit z. Altin Binaj nga procedura e emërimit në Gjykatën e Lartë", – Relator Alban Toro;
 - Vendim nr. 171, datë 11.09.2019 "Për skualifikimin dhe përjashtimin e kandidatit z. Altin Binaj nga procedura e emërimit në Gjykatën e Lartë" i KLGJ-së.
 - Relacion me nr. 5214 prot., datë 22.10.2019 "Për gjendjen e faktit dhe ligjin e zbatueshëm në lidhje me verifikimin e kushteve dhe kritereve ligjore të kandidimit për gjyqtar në Gjykatën e Lartë, nga radhët e juristëve të spikatur, të kandidatit z. Theodhor Sollaku", – Relator Alban Toro;
 - Projektvendim "Për skualifikimin dhe përjashtimin e kandidatit z. Theodhor Sollaku nga procedura e emërimit në Gjykatën e Lartë", – Relator Alban Toro;
 - Vendim nr. 228, datë 22.10.2019 "Për skualifikimin dhe përjashtimin e kandidatit z. Theodhor Sollaku nga procedura e emërimit në Gjykatën e Lartë" i KLGJ.
 - Relacion me nr. 2335 prot., datë 25.04.2024 "Për gjendjen e faktit dhe ligjin e zbatueshëm në lidhje me verifikimin e tre kritereve ligjore të kandidimit për lëvizjen paralele, të kandidates znj. Maela Alicantaj" – Relator Alban Toro;
 - Projektvendim "Për kualifikimin e kandidates Maela Alicantaj dhe vijimin e procedurës së lëvizjes paralele në Gjykatën Administrative të Shkallës së parë Tiranë", – Relator Alban Toro, miratuar me vendim nr. 222, datë 25.04.2024 të KLGJ.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

- Relacion me nr. 4874 prot., datë 21.09.2023 "Për kërkesën e Z.Altin Binaj për caktimin në pozicionin gjyqtar në Gjykatën e Apelit Juridiksioni i Përgjithshëm"— Relator Alban Toro;
 - Projektvendim "Për kërkesën e Z.Altin Binaj për caktimin në pozicionin gjyqtar në Gjykatën e Apelit Juridiksioni i Përgjithshëm", – Relator Alban Toro, miratuar me vendim nr. 232, datë 02.05.2024 të KLGJ.
- Vërtetim datë 27.06.2025 i Tonuçi & Partners, sipas të cilës vërtetohet se, “*Alban Toro ka bashkëpunuar dhe asistuar duke formuluar kërkesën ankimore për Gjykatën Kushtetuese në favor dhe në interes të ENEL SPA & ENEL Power SPA Itali, së bashku me avokatët e Tonuçi & Partners Shqipëri dhe Chiomenti Itali për çështjen: "Albania Beg Ambiente" shpk kundër ENEL SPA & ENEL Power SPA, Vendimi Gjykatës së Rrethit Gjyqësor Tiranë nr. 2251, datë 24.03.2009, Vendimi Gjykatës Apelit Tiranë nr. 796, datë 28.04.2010 dhe Vendimi Gjykatës së Lartë nr. 00-2011-108, datë 7.03.2011: lidhur me instrumentin e mbrojtjes në Gjykatën Kushtetuese për: vlerësim dhe gjykim veçanërisht nëse Gjykata Kushtetuese e Republikës së Shqipërisë mund të siguronte "mundësi efektive dhe të menjëhershme mbrojtje" kundrejt vendimeve të gjykatave shqiptare për shkak të shkeljeve procedurale dhe materiale kundër ENEL SPA & ENEL Power SPA.*”, bashkëlidhur shkresë dërguar nga av. N. K., dhe A. Toro dhe një opinion ligjor eksperti lidhur me çështjen “Albania Beg Ambient” shpk kundër EEL spa dhe Enelpower spa, me vendimin nr. 2251, datë 24.03.2009 të Gjykatës së Rrethit Gjyqësor Tiranë, vendimin nr. 796, datë 28.04.2010 të Gjykatës së Apelit Tiranë dhe vendimin nr. 00-2011-108, datë 7.3.2011 të Gjykatës së Lartë dhe për të vlerësuar nëse Gjykata Kushtetuese e Republikës së Shqipërisë mund të kishte ofruar një “mjet juridik efektiv dhe të përshtatshëm” për riparimin e shkeljeve që “Enel” ka përjetuar në Shqipëri nga këto vendime gjyqësore - dorëzuar fizikisht në anglisht dhe elektronikisht të përkthyer në shqip.

5 (pesë) dokumentet e përzgjedhura nga kandidati:

- a. Relacion nr. 4419 prot., datë 10.09.2011, si edhe vendimi nr. 171 datë 11.09.2019 i Këshillit të Lartë Gjyqësor;
- b. Relacion nr. 4874 prot., datë 21.09.2023, si edhe vendimi nr. 232 datë 02.05.2024 i Këshillit të Lartë Gjyqësor;
- c. Praktika në lidhje me çështjen GEN-I Tirana shpk kundër Banka Intesa SanPaolo Albania sha;
- d. Praktika në lidhje me çështjen me palë paditëse R. B. kundër Tirana Bank sha;
- e. Opinioni Ligjor për çështjen Albania Beg Ambient shpk kundër ENNEL spa dhe ENNEL Power spa.

40. Mbështetur në këto të dhëna të rezultateve në ushtrimin e detyrës, si dhe në tematikën e përmbajtjes e produkteve profesionale të lidhura me ushtrimin e detyrës apo edhe me ushtrimin e profesionit, Këshilli vlerëson se në aspektin sasior kandidati Alban Toro ka tregues pozitiv angazhimi profesional, i cili rezulton të jetë mbi atë që mund të gjykohet si një angazhim i zakonshëm apo “mesatar” në ushtrimin e profesionit. Për këto arsye, Këshilli çmoi ta vlerësojë kandidatin Alban Toro për këtë kriter ligjor vlerësimi, gjithsej me **30.5 Pikë**.

41. Për sa i përket vlerësimit cilësor, Këshilli shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidati Alban Toro, veçanërisht pesë prej dokumenteve të përzgjedhura prej tij, me synimin për të evidentuar, bazuar në tregues shkencorë, elementë që dëshmojnë arritjen e rezultateve profesionale, shkallën e këtyre

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

arritjeve, përfshirë elementë që nga këto dokumente profesionale dhe në tërësi nga veprimtaria profesionale e kandidatit dëshmojnë spikatjen dhe dallueshmërinë e tij në kuptimin dhe qëllimin për të cilin Kushtetuta dhe ligji e përcakton si kusht për vlerësimin e kandidaturës për këtë Këshill dhe, më tej, për për zgjedhjen e gjyqtarit të Gjykatës Kushtetuese nga organet e emërtesës.

42. Në veprimet përgatitore të kryera gjatë procedurave të verifikimit të kandidaturës, kandidati Alban Toro ka depozituar pranë Këshillit dokumentacionin përkatës për vlerësim dhe ka për zgjedhur pesë dokumente.

43. Në lidhje me tërësinë e dokumenteve profesionale të paraqitura nga kandidati Alban Toro, për realizimin e vlerësimit profesional dhe të pikëzimit përkatës për këtë kriter ligjor vlerësimi, Këshilli shqyrtoi dhe bisedoi në mënyrë të posaçme dhe të kujdesshme përmbajtjen e tyre, duke u mbështetur mbi indikatorë shkencorë, sikurse janë edhe ato të përmendura në Shtojcën nr. 1 të vendimit sipas vendimit nr. 5 datë 02.04.2019 të këtij Këshilli, si edhe orientime që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

44. Dokumentet profesionale të shqyrtuara trajtojnë tematika të ndryshme që lidhen me: *praktika gjyqësore si avokat e lidhur me përmbushjen e detyrimeve të lidhura me garancitë bankare, opinione ligjore/analiza të juridiksionit kushtetues, si dhe relacione e projektvendime nga veprimtaria e tij si anëtar i Këshillit të Lartë Gjyqësor.*

45. Njëri ndër indikatorët vlerësues të dokumenteve profesionale është “*Origjinaliteti dhe/ose impakti*”, duke marrë në konsideratë faktin se nuk ka të dhëna për plagjiaturë të punimeve të sipërcituara. Nisur nga përvoja profesionale e gjatë si avokat dhe jurist i nivelit të lartë në sektorin privat dhe publik, përmbajtja e dokumenteve të për zgjedhura, Këshilli vëren se punimet profesionale të analizuar, dëshmojnë qasje profesionale origjinale dhe ekspertizë në trajtimin e çështjeve në fushën e të drejtës tregtare dhe ndërkombëtare, por pa impakt të rëndësishëm. Gjithashtu, vihet re origjinalitet dhe qasje analitike për trajtimin e rolit të Gjykatës Kushtetuese, me impakt, kjo e fundit në diferencimin e qartë të juridiksionit kushtetues dhe atij të zakonshëm, si dhe në sqarimin se Gjykata Kushtetuese nuk funksionon si “Super Gjykatë e Lartë”. Punimet profesionale dëshmojnë për përdorimin e jurisprudencës së Gjykatës Kushtetuese dhe të Gjykatës Evropiane të të Drejtave të Njeriut, me citime të sakta të vendimeve dhe të standardeve, aftësi kjo për të përforcuar argumentimin me referenca të drejtëpërdrejta/relevante jurisprudenciale. Struktura e arsytimit dhe gjuha është e qartë, megjithatë herë pas here punimi ngarkohet me pasazhe të gjata doktrinare, të cilat ndonëse tregojnë kulturë juridike, e bëjnë argumentimin më të rënduar dhe më pak konçiz. Po ashtu, bibliografia nuk është e plotë, duke e ulur nivelin e dokumentimit akademik. Në tërësi, punimet profesionale tregojnë nivel profesional mbi mesataren, me aftësi analitike dhe në identifikimin e zgjidhjeve me anë të zhvillimit logjik të koncepteve ligjore. Konstatohet se përdor në mënyrë korrekte termat juridik dhe respekton rregullat gramatikore, pa gabime të dukshme.

46. Për sa i përket treguesit vlerësues të lidhur me “*Aftësitë analitike*”, Këshilli vëren se dokumentet profesionale të shqyrtuara, kandidati Alban Toro tregon zotërimin e aftësive analitike të larta për të analizuar informacionin dhe për të identifikuar, arsyetuar dhe zbatuar konceptet ligjore, parimet dhe institutet e së drejtës, sipas natyrës dhe qëllimit të vetë këtyre punimeve. Dokumentet profesionale sidomos ato të për zgjedhura nga kandidati si pjesë e punimeve më të dalluara të tij, shfaqin aftësi dalluese analitike lidhur me konceptet ligjore, në mënyrë të veçantë qasje analitike për rolin e Gjykatës Kushtetuese, si dhe ndarjen e

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

juridiksionit kushtetues nga ai i zakonshëm. Kandidati ka aftësi analitike të dalluara në strukturimin e argumentimit, përdorimin e saktë të jurisprudencës së Gjykatës Kushtetuese dhe të GJEDNJ si bazë krahasimi për forcimin e arsytimit, aftësi në evidentimin e elementeve thelbësorë të çështjeve dhe aftësi për të ndërtuar konkluzione të mbështetura logjikisht. Kandidati dallohet për arsytim të strukturuar dhe të qartë, përdorimin korrekt të termave juridikë, si dhe për mënyrën origjinale të trajtimit të çështjeve.

47. Në lidhje me treguesin vlerësues “*Aftësitë kërkimore*”, Këshilli shqyrtoi dokumentet profesionale të përzgjedhura nga kandidati Alban Toro, sikurse edhe dokumentet profesionale, të paraqitur në dosjen e kandidatit. Nga ky shqyrtim, Këshilli vëren se këto punime përmbajnë informacione të lidhura me fusha të ndryshme të së drejtës, kryesisht në të drejtën tregtare (bankare), por edhe mbi gjendjen e faktit dhe zbatimin e mekanizmave ligjorë për plotësimin e pozicioneve të lira në gjykata. Për arritjen e lëndës së trajtuar dhe qëllimin e punimit profesional, nga përmbajtja e punimeve të shqyrtuara, vërehet, ndonëse jo gjithmonë (pra në mënyrë sporadike), përdorim dhe referim i jurisprudencës kombëtare dhe ndërkombëtare (GJK dhe GJEDNJ) për të mbështetur analizën ligjore, me citime të sakta të vendimeve dhe standardeve, megjithëse jo gjithnjë me bibliografi të plotë.

48. Për treguesit “*Saktësia dhe precizoni*”, në thelb, u verifikua nëse në veprimtarinë profesionale të kandidatit janë mbuluar me profesionalizëm tematika e përzgjedhur dhe materiali ka shmangur përsëritjet apo citimet e panevojshme etj. Nga shqyrtimi i dokumenteve profesionale të përzgjedhura nga kandidati Alban Toro, Këshilli vëren se këto punime tregojnë arsytim të strukturuar dhe të qartë, ndonëse herë herë të ngarkuar me pasazhe doktrinare, referenca ndaj praktikës së GJK dhe GJEDNJ, me citime të sakta të vendimeve dhe standardeve, identifikim të zgjidhjeve me anë të zhvillimit logjik të koncepteve ligjore, përdorim korrekt të terminologjisë juridike, si dhe respektim të rregullave gramatikore, pa gabime të dukshme.

49. Në lidhje me treguesin vlerësues “*Qartësia*”, Këshilli shqyrtoi dokumentet profesionale të përzgjedhura nga kandidati Alban Toro, sikurse edhe punimet profesionale të paraqitura në dosjen e kandidatit. Këshilli vëren se këto punime janë të organizuara dhe strukturuara në mënyrën e duhur, gjuha e përdorur është qartë, profesionale dhe në respektim të rregullave gramatikore. Qartësia e gjuhës së përdorur dhe strukturimi i materialit i bëjnë këto punime të kuptueshme dhe të lexueshme, sipas natyrës së punimit dhe subjekteve të cilave i drejtohet.

50. Këshilli, pasi shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidati për sa i përket vlerësimit cilësor, në drejtim të treguesve/indikatorëve të mësipërm, vjen në përfundimin se kandidati Alban Toro vlerësohet në total me **162 Pikë**.

C. Meritat profesionale – Kualifikimi Shtesë Profesional

51. Në shkronjën “b” të pikës 2 dhe shkronjën “b” të pikës 3 të nenit 7/a të ligjit nr. 8577/2000, në shkronjën “b” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e shtesë profesional, përcaktohen si kritere vlerësimi që kandidatët të kenë veprimtari të njohur në fushën e të drejtës kushtetuese, të drejtave të njeriut dhe në sfera të tjera të së drejtës, vlerësim të dallueshëm të rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, përvojë të veçantë në një fushë të caktuar të së drejtës, ose këshilltar ligjor i Gjykatës

Këshilli i Emërimeve në Drejtësi 2025

Adresa Postare : GJKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Kushtetuese a Gjykatës së Lartë, si edhe pjesëmarrje të dallueshme në procesin e hartimit ose të konsultimit të legjislationit dhe çdo angazhim tjetër profesional të kandidatit përgjatë 5 viteve të fundit në fushën e së drejtës.

52. Prandaj, në zbatim të ligjit, në varësi edhe të profileve dhe karrierave profesionale të secilit kandidat, nga totali prej 12 pikësh për këtë kategori vlerësimi, Këshilli i Emërimeve në Drejtësi vlerëson deri në 8 pikë ekspertizën në të drejtën kushtetuese dhe në të drejtat e njeriut ose ekspertizën në fusha të tjera të veçanta të së drejtës. Gjithashtu, Këshilli vlerëson deri në 4 pikë angazhimet profesionale shtesë të kandidatëve. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

Specializimi në të drejtën kushtetuese, të drejtat e njeriut ose në fusha të tjera të së drejtës

53. Për sa i përket kriterit të parë vlerësues, *ekspertizës në të drejtën kushtetuese dhe në të drejtat e njeriut ose ekspertizës në fusha të tjera të veçanta të së drejtës*, nisur nga të dhënat që rezultojnë nga jetëshkrimi, motivimi për kandidim, intervista dhe dokumente të tjera zyrtare mbi rezultate të vlerësimit profesional etj., si edhe nga shqyrtimi i dokumenteve profesionale të paraqitura nga kandidati Alban Toro, Këshillit i rezulton se kandidati ka specializime/angazhim në fusha përtej profilit bazë, ka trajnime të hershme në fushën bankare dhe punime me dimension ndërkombëtar (sikurse bashkëpunime me studio ligjore italiane, analizë e mjetit kushtetues) që tregojnë horizont profesional përtej praktikës rutinë, por nuk evidentohet qartazi specializime të mirëfillta në fushën e të drejtës kushtetuese.

54. Si rrjedhojë dhe reflektim i përgatitjes profesionale dhe përvojës së fituar, kandidati Alban Toro në cilësinë e autorit ka realizuar punime profesionale, të cilat në pjesën më të madhe të tyre, trajtojnë aspekte të së drejtës tregtare, veçanërisht lidhur me të drejtën e sistemit bankar por edhe në lidhje me gjendjen e faktit, interpretimin dhe zbatimin e ligjeve në procedurat e lëvizjes dhe kualifikimit në pozicione të caktuara në sistemin gjyqësor, dhe ndonëse nuk konstatohen specializime të drejtpërdrejta në fushën e gjyqësorit kushtetues, angazhimi i gjatë në profesionin e avokatit dhe si jurist i nivelit të lartë natyrshëm nënkupton ekspozimin e tij edhe ndaj të drejtave kushtetuese të njeriut.

55. Prandaj, në lidhje me kriterin vlerësues të *“ekspertizës në të drejtën kushtetuese dhe në të drejtat e njeriut ose në fusha të tjera të së drejtës”* Këshilli vlerëson t’i caktojë kandidatit Alban Toro, gjithsej **35.5 Pikë**.

Angazhime profesionale shtesë

56. Nga aktet e dosjes dhe nga vetëdeklarimet e kandidatit Alban Toro, rezulton se ka pasur këto angazhime shtesë profesionale:

56.1 Kandidati Alban Toro në vitet 2016-2018, rezulton se është angazhuar nëpërmjet dhënies së një cikli leksionesh në fushën e së drejtës në lëndën "Qytetari" pranë Institucionit Arsimor Jopublik "Faik Konica", duke u fokusuar në mënyrë të veçantë në lidhje me njohjen e Kushtetutës së Republikës së Shqipërisë, zhvillimi i së drejtës kushtetuese dhe rëndësinë e saj, ndarjen e pushteteve, të drejtat e individit. Gjithashtu, kandidati Alban Toro në periudhën Mars

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

1997 - Gusht 2000, rezulton se ka qenë përfaqësues i Bankës Kombëtare Tregtare sha në Këshillin Drejtues të Bankës Italo-Shqiptare.

56.2 Po ashtu kandidati ka vetëdeklaruar se ka përvojë profesionale si “*pedagog*”, me kohë të pjesshme në Fakultetin e Gazetarisë, Universiteti i Tiranës”, në periudhën Shkurt 1999 – Shkurt 2003. Lidhur me këtë vetëdeklarim, gjatë procedurës së verifikimit të kandidaturës, Këshilli i është drejtuar me shkresën nr. 239 prot., datë 28.05.2025, Fakultetit të Historisë dhe Filologjisë, Universiteti i Tiranës (pjesë e të cilit është Departamenti i Gazetarisë dhe i Informimit), i cili me shkresën nr. 642/1 prot., datë 9.6.2025 ka bërë me dije KED se kandidati nuk është pjesë e stafit të këtij Fakulteti. Vetë kandidadi Alban Toro në kohën e aplikimit por edhe deri në marrjen e këtij vendimi nuk ka paraqitur dokumentacion provues lidhur me këtë veprimtari, pavarësisht se rezulton të ketë paraqitur kërkesë pranë Fakultetit të Historisë dhe Filologjisë, duke kërkuar konfirmimin mbi ushtrimin e veprimtarisë së tij si pedagog me kohë të pjesshme pranë këtij institucioni.

57. Prandaj, duke pasur parasysh këto angazhime për aq sa ato dokumentohen në dosje, si dhe faktin që nuk evidentohen dukshëm prezantime në konferenca shkencore kombëtare e ndërkombëtare, kontribut në hartim legjislacioni, Këshilli vlerëson që për kriterin vlerësues të “*angazhimeve profesionale shtesë*”, t’i caktojë kandidatit Alban Toro, gjithsej **16.5 Pikë**.

Meritat Morale

58. Në shkronjën “c” të pikës 2 të nenit 7/a të ligjit nr. 8577/2000 si kriter vlerësimi është përcaktuar që kandidatët të jenë vlerësuar për “*integritetin etik e moral*”. Po kështu, në shkronjën “a” të pikës 1 të nenit 240 të ligjit nr. 115/2016 përcaktohen si kriter “*Rezultatet e vlerësimit të etikës së kandidatëve gjatë punës, nëse ka*”, ndërsa në shkronjat “a” dhe “b” të pikës 2 të këtij neni përcaktohen si kriter vlerësimi edhe “*Reputacioni që gëzon kandidati në shoqëri dhe midis kolegëve*” dhe “*cilësitë morale, të tilla si ndershmëria, përpikëria në ushtrimin e detyrave, drejtësia në marrjen e vendimeve, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi*”. Së fundi, në shkronjën “c” parashikohet si kriter vlerësimi edhe “*angazhimi i provuar në ndjekje të kauzave të shoqërisë civile*”. Në bazë dhe për zbatim të ligjit, lidhur me këto kriter vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

59. Prandaj, në zbatim të ligjit, lidhur me meritat morale, nga totali prej 30 pikësh për të tre komponentët vlerësues, Këshilli i Emërimeve në Drejtësi vlerëson deri në 18 pikë *integritetin etik dhe moral*, deri në 10 pikë *reputacionin që gëzon kandidati në shoqëri dhe midis kolegëve* dhe deri në 2 pikë *angazhimin e provuar në ndjekje të kauzave të shoqërisë civile*. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

60. Në lidhje me “meritat morale”, krahas të dhënave që rezultojnë nga jetëshkrimi, mbahen parasysh edhe gjetjet në procedurën e verifikimit të kandidatit, ku përmbahen të dhëna që kanë të bëjnë apo mund të përdoren për efekte të vlerësimit të integritetit etik e moral të kandidatit, angazhime në kauza të shoqërisë civile etj. Gjithashtu, për këtë komponent të vlerësimit

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

mbahen parasysh edhe të dhëna e përfundime që mund të nxirren gjatë intervistës së kandidatit me Këshillin e Emërimeve në Drejtësi.

61. Nga kandidati në lidhje me këtë kriter nuk janë dorëzuar dokumente në lidhje me vlerësimin e punës të realizuara. Gjithashtu, nga përgjigjet e ardhura nga punëdhënësit e kandidatit Alban Toro gjatë fazës së parë të procedurës nuk rezulton të jenë paraqitur apo referuar vlerësime pune.

62. Në rastin e kandidatit Alban Toro, krahas jetëshkrimit, paraqitjes dhe sjelljes gjatë parashtrimeve në intervistë, motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave morale të këtij kandidati.

Integriteti etik e moral

63. Për sa i përket kriterit të parë vlerësues, *integritetit etik e moral*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga të dhëna të tjera të disponueshme, Këshilli i rezulton se për kandidatin Alban Toro nuk ka shënime për masa disiplinore apo cenime integriteti, duke reflektuar profil etik të lartë e të qëndrueshëm. Ka dalluar gjatë veprimtarisë së tij si anëtar i Këshillit të Lartë Gjyqësor, si dhe ka treguar përkushtim në zbatimin e drejtë të ligjit sipas kompetencave dhe përgjegjësi që i ngarkon ligji.

64. Prandaj, në lidhje me kriterin vlerësues të “*integritetit etik e moral*” Këshilli vlerëson t’i caktojë kandidatit Alban Toro **161.5 Pikë**.

Reputacionin që gëzon kandidati në shoqëri dhe midis kolegëve

65. Për sa i përket kriterit të dytë vlerësues “*reputacioni që gëzon kandidati në shoqëri dhe midis kolegëve*”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshilli i rezulton se kandidati Alban Toro ka një karrierë të gjatë profesionale po indicje negative në ekstraktet e verifikuara, reflekton përgjegjshmëri në angazhimet profesionale, si dhe gëzon reputacion pozitiv mes kolegësh. Kandidati gëzon reputacion në radhët e juristëve, po ashtu ka sjellje dhe cilësi morale që përmbushin pritshmëritë e shoqërisë për cilësitë profesionale të gjyqtarit të Gjykatës Kushtetuese.

66. Prandaj, në lidhje me kriterin vlerësues të “*reputacioni që gëzon kandidati në shoqëri dhe midis kolegëve*” Këshilli vlerëson t’i caktojë kandidatit Alban Toro, gjithsej **83.5 Pikë**.

Angazhimi i provuar në ndjekje të kauzave të shoqërisë civile

67. Për sa i përket kriterit të dytë vlerësues “*angazhimi i provuar në ndjekje të kauzave të shoqërisë civile*”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

vlerësimit, si edhe nga dokumente të tjera zyrtare apo të aksesueshme publikisht, Këshilli i rezulton se, kandidati Alban Toro ka marrë pjesë në mënyrë sporadike në aktivitete të interesit publik, por jo në mënyrë të vazhdueshme.

68. Prandaj, në lidhje me kriterin vlerësues “angazhimi i provuar në ndjekje të kauzave të shoqërisë civile” Këshilli vlerëson kandidatin Alban Toro, gjithsej me **2.5 Pikë**.

Meritat organizative, drejtuese dhe menaxheriale

69. Në nenin 240 të ligjit nr. 115/2016 parashikohen si kriterë vlerësimi disa komponentë të lidhura me aftësitë profesionale dhe personale të kandidatëve mbi çështjet e natyrës drejtuese, organizative, të kapacitetit për vendimmarrje, punës në grup, të komunikimit dhe përfaqësimit publik. Kështu, në pikën 3 të këtij neni parashikohen kriteret vlerësuese për kandidatët si më poshtë:

“a) cilësinë e platformës dhe të vizionit që paraqesin”;

b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;

c) aftësitë e komunikimit;

ç) aftësitë e të punuarit në grup dhe në ambiente multidisiplinore ose multikulturore;

d) aftësitë e përfaqësimit publik”.

70. Në bazë dhe për zbatim të ligjit, lidhur me këto kriterë vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

71. Prandaj, në zbatim të ligjit, lidhur me meritat organizative, drejtuese dhe menaxheriale, nga totali prej 10 pikësh për të pesë komponentët vlerësues të sipërcituar, Këshilli i Emërimeve në Drejtësi vlerëson deri në 3 pikë *cilësinë e platformës dhe të vizionit që paraqesin* kandidatët, deri në 4 pikë *aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*, deri në 2 pikë *aftësitë e komunikimit dhe aftësitë e përfaqësimit publik*, si edhe me 1 pikë për *aftësitë e të punuarit në grup dhe në ambiente multidisiplinore ose multikulturore*. Në arsyetimin dhe përfundimet e tij, Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

72. Në rastin e kandidatit Alban Toro krahas jetëshkrimit, paraqitjes dhe sjelljes gjatë parashkrimeve dhe bisedës në intervistë, përmbajtjes së motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave organizative, drejtuese dhe menaxheriale të këtij kandidati.

Cilësia e platformës dhe të vizionit

73. Këshilli shqyrtoi përmbajtjen e dokumentit me shkrim, platformës mbi motivimin e kandidimit dhe vizionit të kandidatit Alban Toro lidhur me qasjen dhe qëndrimet e tij mbi

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

rëndësinë dhe aspektet thelbësore të ushtrimit të detyrës së gjyqtarit të Gjykatës Kushtetuese, mbi sfidat kryesore me të cilat është përballur dhe duhet të përballët Gjykata Kushtetuese në ushtrimin e përgjegjësve dhe kompetencave që i ngarkon Kushtetuta dhe ligji. Gjithashtu, në vlerësimin e këtij kriteri, Këshilli mban parasysh edhe parashtrimet dhe shpjegimet e dhëna nga ky kandidat gjatë intervistës dhe në përgjigje të pyetjeve që iu drejtuan nga anëtarët e Këshillit.

74. Nisur nga dokumenti me shkrim dhe shpjegimet e paraqitura gjatë intervistës, Këshilli vëren se kandidati Alban Toro ka paraqitur një platformë të qartë, me vizion për konsolidimin e Gjykatës Kushtetuese dhe me orientim praktik për gjykimin kushtetues, por pa një thellim teorik të plotë. Gjithashtu, ky kandidat parashtron optikën e tij në mënyrë të thjeshtë, në mënyrë profesionale për problematika aktuale dhe të së ardhmes, si dhe dha sugjerime konkrete për përmbushjen e misionit të Gjykatës Kushtetuese, duke iu referuar parimeve të pavarësisë, integritetit, transparencës, barazisë para ligjit.

75. Prandaj, në lidhje me kriterin vlerësues “*cilësia e platformës dhe të vizionit të paraqitur*” Këshilli vlerësoi t’i caktojë kandidatit Alban Toro, gjithsej **21.5 Pikë**.

Aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore

76. Lidhur me aftësitë e provuara për të marrë vendime dhe përgjegjësi, Këshilli mbështetet pikësepari në të dhënat që lidhen me përvoja konkrete nga karriera e kandidatëve në funksione dhe pozicione të cilat kërkojnë dhe tregojnë marrjen përsipër të përgjegjësive dhe ushtrimin e vendimmarrjes në ushtrimin e kompetencave dhe përmbushjen e detyrave të ngarkuara. Gjithashtu, në vlerësimin e kandidatëve për këtë komponent vlerësimi, Këshilli mban parasysh se ushtrimi i çdo detyre, funksioni dhe veprimtarie profesionale, edhe kur formalisht nuk lidhet drejtpërdrejt me të drejtën/detyrimin për ushtrimin e kompetencës vendimmarrëse, gjithsesi përmban elementë që tregojnë aftësi të provuara ose premtuese për të marrë nisma, për të kërkuar zgjidhje, për të marrë përgjegjësi si edhe vendimet e duhura e në kohën e duhur sipas përcaktimeve të ligjit dhe në përgjigje të ndjeshmërisë së publikut.

77. Në rastin e kandidatit Alban Toro, krahas jetëshkrimit, parashtrimeve dhe bisedës në intervistë, përmbajtjes së platformës dhe motivimit për kandidim, Këshilli i Emërimeve në Drejtësi shqyrtoi të dhënat nga dokumentet profesionale, si edhe aktet e tjera zyrtare të administruara në dosjen e kandidatit, për të evidentuar të dhëna në lidhje me aftësitë e provuara apo premtuese të këtij kandidati për të marrë vendime dhe përgjegjësi edhe në ushtrimin e funksionit të gjyqtarit të Gjykatës Kushtetuese. Këshilli evidenton se kandidati ka përvojë për 5 vite e 7 muaj si anëtar i Këshillit të Lartë Gjyqësor, përvojë kjo e drejtpërdrejtë vendimmarrëse institucionale.

78. Këshilli evidenton në lidhje me kandidatin Alban Toro se, për shkak të ushtrimit të detyrës si anëtar i Këshillit të Lartë Gjyqësor, ka eksperiencë në vendimmarrjet e organeve kolegjiale dhe për rrjedhojë ka mbajtur përgjegjësi, si dhe ka reflektuar aftësi të mira menaxhuese, planifikuese dhe për administrimin e punës. Prandaj, në lidhje me kriterin vlerësues “*aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*”, Këshilli vlerëson t’i caktojë kandidatit Alban Toro, gjithsej **30 Pikë**.

Aftësitë e komunikimit dhe aftësitë e përfaqësimit publik

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

79. Aftësitë e komunikimit, në të gjitha format, sikurse edhe në përfaqësimin publik e me të tretët, të shprehurit në mënyrë të qartë, lehtësisht të kuptueshme, të matur, me respekt dhe në mënyrë jodiskriminuese, luajnë një rol të rëndësishëm në kryerjen e funksionit të gjyqtarit të Gjykatës Kushtetuese.

80. Nga shqyrtimi i jetëshkrimit, mënyra dhe stili i parashtrimeve me shkrim të platformës, sjellja, mënyra e komunikimit dhe argumentimit gjatë bisedës në intervistë, si edhe nga përmbajtja, strukturimi dhe stili i hartimit të dokumenteve profesionale të administruara në dosjen e kandidatit, Këshilli vëren se kandidati Alban Toro shfaq komunikim të mirë publik e profesional por jo ekspozim institucional të gjerë. Kandidati është racional në të folur dhe karakterizohet nga qetësia dhe durimi në komunikim. Është i sjellshëm dhe serioz me kolegët, si dhe zotëron aftësi të mira për të komunikuar.

81. Prandaj, në lidhje me kriterin vlerësues të “*Aftësitë e komunikimit dhe aftësitë e përfaqësimit publik*”, Këshilli vlerëson ti caktojë kandidatit Alban Toro, gjithsej **15 Pikë**.

Aftësitë e të punuarit në grup dhe në ambiente multidisiplinore ose multikulturore

82. Gjyqtari i Gjykatës Kushtetuese, për vetë natyrën e këtij funksioni, mënyrës së funksionimit dhe kolegjalitetit të kërkuar në veprimtarinë e vendimmarrjen kësaj Gjykate, duhet të zotërojë aftësitë e duhura për një qasje metodike ndaj punës, si dhe aftësinë për të qenë i përfshirë në punën në grup, me gjyqtarët e tjerë, këshilltarët dhe anëtarët e stafit të Gjykatës. Pjesë e kësaj aftësie është edhe nevoja për t’u përshtatur shpejt me zhvillimet e reja, si edhe ndaj nevojës për t’u përfshirë në veprimtari në ambiente multikulturore dhe multidisiplinore gjatë karrierës gjyqësore.

83. Nga shqyrtimi i jetëshkrimit, sjellja, mënyra e komunikimit dhe argumentimit gjatë bisedës në intervistë, si edhe nga dokumentet profesionale të administruara në dosjen e kandidatit, Këshilli vëren se kandidati Alban Toro për shkak të përvojës në organe kolegjiale (KLGJ) dhe ekipe të përziera juridike zotëron aftësi shumë të mira për të punuar në grup, duke patur aftësitë e nevojshme për të punuar në kolegje dhe mbledhjen e gjyqtarëve sikurse funksionon Gjykata Kushtetuese. Prezantimi dhe dokumentet profesionale dëshmojnë se, ky kandidat është përfshirë vijë mësisht në projekte profesionale me kolegë të tjerë, vendas apo të huaj, për realizimin e veprimtarive dhe dokumenteve profesionale. Një vlerë e shtuar në këtë kuadër është edhe përvoja e tij si anëtar i Këshillit të Lartë Gjyqësor.

84. Prandaj, në lidhje me kriterin vlerësues “*Aftësitë e të punuarit në grup dhe në ambiente multidisiplinore ose multikulturore*”, Këshilli vlerëson t’i caktojë kandidatit Alban Toro, gjithsej **9 Pikë**.

85. Në përfundim të arsyetimit mbi mënyrën dhe shkallën e vlerësimit për të gjitha kriteret ligjore të parashikuara nga ligji dhe të pikëzimit përkatës të treguar më sipër në këtë Vendim, në funksion të procedurave ligjore të përzgjedhjes së gjyqtarit të Gjykatës Kushtetuese dhe për efekt të renditjes së kandidatëve për vendet vakante në të cilat ka kandiduar, Këshillit të Emërimeve në Drejtësi i rezulton se kandidati Alban Toro reflekton profilin e kandidatit me një përvojë të gjatë si Avokat, kryesisht me produkt gjyqësor para gjykatave (parashtrime/konkluzione/opinione ligjore), me cilësi të mirë argumentimi (qartësi, saktësi, analizë dhe referencë të standardeve), por kryesisht me fokus në sferën e të drejtës private dhe me ekspertizë materiale të fituar nga përvoja e gjatë si avokat.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

86. Përsa më sipër, rezulton se kandidati Alban Toro ka grumbulluar **668** (gjashtëqind e gjashtëdhjetë e tetë) pikë në tërësi, nga vlerësimet e të gjithë anëtarëve të Këshillit për çdo komponent vlerësimi. Sikurse është evidentuar edhe në Kreun II të këtij vendimi, rezultati përfundimtar i kandidatit (i cili është pasqyruar edhe në tabelat përkatëse që gjenden në faqen zyrtare Gjykatës së Lartë, në Rubrikën KED), përftohet nga mesatarja kolegjiale e pikëve të nëntë anëtarëve, rrjedhimisht kandidati Alban Toro vlerësohet në total me **74.22 pikë**.

87. Duke peshuar në mënyrë të integruar të tre blloqet dhe provat e dosjes, zbatimi simetrik i metodologjisë e bën totalin 74.22 pikë, proporcional, bindës dhe të qëndrueshëm në leximin kolegjial.

PËR KËTO ARSYE:

Në mbështetje të pikës 1 të nenit 149/d të Kushtetutës, të nenit 7/a dhe 7/ç të ligjit nr. 8577/2000 “*Për organizimin dhe funksionimin e Gjykatës Kushtetuese të Republikës së Shqipërisë*”, të nenit 239 dhe 240 të ligjit nr. 115/2016 “*Për organet e qeverisjes së sistemit të drejtësisë*”, të pikës 3, 5, 6, 7, 8, 9, 10 e vijues të Vendimit të Këshillit të Emërimeve në Drejtësi nr. 5 datë 02.04.2019 “*Për Kriteret dhe Procedurën e Vlerësimit, Pikëzimit dhe Renditjes së Kandidatëve për Pozicionet Vakante në Gjykatën Kushtetuese dhe të Inspektorit të Lartë të Drejtësisë*”, Këshilli i Emërimeve në Drejtësi

VENDOSI:

1. Vlerësimin e kandidatit Alban Toro, me **74.22 Pikë** në vendin vakant për gjyqtar në Gjykatën Kushtetuese, të shpallur nga, Gjykata e Lartë në datën datë 11.12.2024.

2. Në zbatim të nenit 238 të Ligjit nr.115/2016, ky vendim i njoftohet kandidatit Alban Toro.

3. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

ANËTAR

Zv/KRYETARE

KRYETAR

Ilir Toska

Marjana Semini

Sokol Sadushi

ANËTARE

ANËTAR

ANËTARE

Alma Muça

Fuat Vjerdha

Enkela Vlora

ANËTARE

ANËTAR

ANËTARE

Irma Balli

Etien Kapo

Nafije Hasko

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302